

V

**ERRUKIZKO AITA**

*Pozez nago kantari  
zeruko Aitari,  
maitez sortu ta erruki haundiz  
salbau nauanari.*

1

Semeak alde egin dau,  
Aita, urrutira,  
baina Zu ezin zara  
penaz erretira.  
Egunero urtenda  
etxe-atarira,  
semea noiz helduko  
ete dan begira.

2

Ardia galdu da ta  
hor artzaina bila,  
troka zuloan topau  
deutsu erdi hila.  
Bizkarrean hartuta  
ai zer poz-pilpila!  
Zorionak emonaz  
hango jente pila!

3

Pekatarari dala ta  
gizonak harrika,  
legearen atxakiz  
a ze erretolika!  
Aita, Zuk aginduta  
Jesus erruki da,  
holan dala esanaz  
Aitaren pratika.

4

Batzuk irribarre ta  
besteak ukatu,  
gurutz-ondoan bazan  
zeinek kondenatu.  
“Aita, ez hartu aintzat  
Neugaitik parkatu,  
danak salbatzera Zeuk  
niduzun bialdu”

5

Jesus eta lapurra  
biak gurutzean:  
“Jesus, nitaz gomutau  
zeruan sartzean”  
-“Gaur han egongo zara  
Neurekin batean,  
Aitatxo han daukagu  
geure zain atean”

6

Zeuk bialdu zenduan  
Semea mundura,  
errukitsu zarala  
erakutsi gura...  
“Izan errukiorrak  
Aitaren modura;  
danok salbatzea da  
Aitaren ardura”

7

Bihotz haundiko Aita  
ta errukiorra,  
guk hau ez sinistea  
hori bai gogorra!  
Zelan izan leiteke  
hain itsu ta gorra?  
Hau da inoiz ordaindu  
ezin dodan zorra.

8

Aita, hori bihotza  
samur ta leiala,  
errukizko itsaso  
sakon ta zabala!  
Egizu hau bihotzez  
sinistu daidala!  
Eskerrik asko, Aita,  
bai ona zarala!